


La'ó Hamutuk

Instituto Timor-Leste ba Monitor no Analiza Dezenvolvimentu

Rua Dom Alberto Ricardo, Bebora, Dili, Timor-Leste

Tel: +670-3321040 ka +670-77234330 (mobile) email: laohamutuk@gmail.com

Website: www.laohamutuk.org



6 Outubro 2023

Karta aberta ba Exelénsia Sr. Eng Marcos da Cruz, MAgSt, Ministru Agrikultura, Peska, Pekuária no Floresta Kona-ba programa no prioridade Governu no Ministériu Agrikultura

La'ó Hamutuk rekoñese katak MAPPF iha papél importante tebes ba dezenvolvimentu nasionál ida ne'ebé sustentável iha area agrikultura, peska, pekuária no floresta ne'ebé liga ba Timor-oan sira hotu nia moris. Ami apresia funsionáriu tomak iha MAPPF ne'ebé dedika-an hodi serve povu liu husi MAPPF. Hanesan organizaun naun-governamental ida ne'ebé eziste dezde kedas tinan 2000 hodi suporta prosesu rekonstrusaun no dezenvolvimentu nasaun nian, La'ó Hamutuk disponivel nafatin atu suporta no servisu hamutuk ho ita-boot sira hotu iha area importante sira ne'e. Liu husi karta ida ne'e, La'ó Hamutuk hakarak fó hanoin kona-ba dezafiu sosiál ekonómiku iha Timor-Leste no MAPPF nia programa sira.

Situasaun Sósiu-ekonómiku

Dezafiu sosiál no ekonomia boot liu ne'ebé povu Timor-Leste hasoru to'ó oras ne'e mak hanesan pobreza multidimensional, dezempregu, inseguransa ai-han no malnutrisaun, dependénsia ba reseita husi petróleu no dependénsia ba importaun, TL nian reseita doméstika (la'ós petrolíferu) seidak iha kbiit atu finansia gastu sira hodi responde ba nesesidade Povu no Estadu nian. Iha futuru nesesidade sira kontinua aumenta tuir kreximentu populaun no inflasaun.

Timor-Leste nian orsamentu estadu kada tinan 85% mai husi Fundu Petrolíferu. Fundu Petróleu hetan barak liu husi produsaun iha kampu Bayu-Undan ne'ebé rezerva hotu ona iha tinan ida ne'e. Timor-Leste laiha rezerva petróleu barak tan, kampu provadu úniku mak *Greater Sunrise*, no dezenvolvimentu no retornu ba kampu ida ne'e kontinua iha inserteza.

Ministériu Finansa, governante sira no instituisaun balun hato'ó preokupasaun barak kona-ba poténsia ba krize finansial sei akontese iha maizumenu tinan 10 tuir mai -- rai-naruk fiskál (*fiscal cliff*) ka falta osan atu selu ba nesesidade povu nian. Fundu Petrolíferu limitadu, Ministériu Agrikultura no Governu presiza define estratéjia apropriadu atu aproveita oportunidade finansial ida ne'e hodi investe ba rekursu umanu liu-liu formasaun ba foin-sa'e, promove atividade produsaun agríkola iha area rural no introdús atividade indústria transformadór sira iha setór agrikultura, nune'e gradualmente bele atrai Povu, kooperativa no setór privadu, liu-liu foin-sa'e sira bele fila fali ba setór importante ida ne'e.

Analiza ba Programa Governu no MAPPF nian

Planu boot Governu IX nian iha pilar boot neen. Iha pilar haat mak foka ba Dezenvolvimentu Ekonomia no inklui agrikultura, pekuária, peska no produsaun floresta nudár setór ekonomia ne'ebé importante. Iha setór agrikultura deskreve programa lubuk ida ne'ebé dí'ak no tenke

kontinua investe ba hodi promove produsaun ai-han, kriasaun animal, peska, kuda kafé, inklui konsersaun floresta, ekolojia no ekonomia ba povu nia.

Programa MAPPF nian balun kontinua programa ne'ebé Governu sira uluk halo ona hanesan distribuisaun tratór boot no ki'ik barak, introdús sistema mekanizasaun, programa kuda hare íbrida, introdús fini foun oin-oin. Programa sira ne'e seidak hatudu rezultadu significativu hodi estimula produsaun no produtividade iha rai laran. Bazeia ba MAPPF nia planu no programa iha orsamentu retifikativu 2023, Governu sei sosa tan tratór 25, no aloka tan orsamentu iha Fundu Infrastrutura tokon \$8 atu reabilita no hadi'ak irrigasaun hotu iha territóriu laran no kontinua sistema mekanizasaun atu estimula produsaun. Refere ba programa sira iha pasadu, Governu no ajénsia internasionál sira investe barak ona irrigasaun, sosa tratór boot no ki'ik barak loos, introdús sistema mekanizasaun, introdús hare íbrida no programa sira seluk maibé rezultadu produsaun seidak optimal hanesan ho orsamentu ne'ebé gasta ona. Signifika, sistema mekanizasaun no investimentu boot hirak ne'e labele garante produsaun hare, batar no ai-han sira seluk atu fó ai-han nato'on ba povu Timor-Leste. Ami sujere katak MAPPF bele halo avaliasaun ba programa sira ne'e no halo estudu kle'an kona-ba kustu ba investimentu no retornu saida mak sei hetan husi programa ne'ebé MAPPF sei halo durante mandatu tinan lima.

Iha mensajen *Tempu ba Mudansa*, Primeiru Ministru Xanana Gusmão dehan katak aproximasaun sira iha setór agrikultura mós tenke iha mudansa no tenke aprende husi programa sira iha pasadu atu halo di'ak liután ba oin. Setór agrikultura hetan intervensaun barak ona no gasta povu nia osan tokon ba tokon, maibé seidak masimiza produsaun iha rai laran. Sasukat ne'ebé ita hare mak *importasaun* kontinua aumenta, presu ai-han kontinua sa'e no produsaun rai laran seidak suficiente. Tanba ne'e, tempu di'ak atu kria planu no estratéjia ne'ebé realistíku hodi hasa'e produsaun ho maneira sustentável no adaptavel tuir Timor-Leste nian estrutura rai, klima, ekolojia no uza teknolojia apropriadu sira ne'ebé la estraga ekolojia.

La'ó Hamutuk sujere promove agrikultura sustentável ho maneira agrikultura familiar, tanba adapta no kondíz ho situasaun agrikultura iha Timor inklui reziliente liu ba situasaun krize klimátika ne'ebé afeta direta no indireta ba produsaun agríkola iha ita rain. Bazeia ba dadus sensu agrikultura 2019 katak 66% uma kain nudár agrikultura no maioria uma kain agrikultór sira iha de'it rai produsaun menus husi 2ha. Informasaun hirak ne'e hatudu katak Timor nia agrikultura ho eskala ki'ik, tanba ne'e alternativu apropriadu mak diversifikasaun produsaun, promove ai-han orgániku no promove agro-ekolojia.

Ami mós preokupa katak Ministériu Agrikultura publika dadus tuan ne'ebé la reprezenta situasaun atuál. Ministériu nia *Buletin Seguransa Ai-Han* fó sai katak area potenciál ba produsaun hare maizumenus 80.000 ha, maibé durante tinan 20 foin utiliza de'it 40.000 ha, nudár area kultivu. Bele dehan seidak utiliza area potenciál ho másimu ba produsaun, nune'e mós rai potenciál ba produsaun batar maizumenus 216.000 ha foin mak utiliza de'it 38.000 ha ba area kultivu. Husi dadus sira ne'ebé Governu uza no temi iha leten, presiza atualiza tanba ami observa rai produtivu barak lakon ona nian funsaun, no uza ba konstrusaun fíziku sira.

Presiza mós foka ba solusaun longu prazu ba problema bee iha rai laran, atu garantia katak irrigasaun sira ne'ebé harii ona sei hetan bee nato'on iha tempu udan no mós bailoron hodi garantia kontinuidade iha produsaun. Nune'e presiza tau atensaun didi'ak no proteje ai-laran sira hodi absorve bee ba rai okos. Ami espera MAPPF sei fó prioridade mós ba reflorestasaun no konsersaun bee inklui oinsá halo programa sira kaptasaun no travasaun bee iha rai lolon, rai okos no mota sira.

Espesífiku liu La'ó Hamutuk hakarak ható'o hanoin no rekomendasaun balu tuir mai:

- Ami enkoraja atu MAPPF uza oportunidade polítika no osan limitadu ne'ebé ita iha Fundu Petrolíferu ba konsolida estratéjia no harii sistema produsaun ida ne'ebé forte no sustentável hodi redús inseguransa ai-ha, malnutrisaun no hametin ekonomia produtivu.
- Dezenvolve polítika diversifikasaun ai-han no produsaun. Investe maka'as produktu ai-han no ai-horis sira seluk, no masimiza didi'ak area potenciál ba produktu ai-han sira seluk alende hare no batar, tuir estilu produsaun iha Timor, kuda ai-han oin-oin.
- Promove programa agro- ekolojia no agrikultura familiár ne'ebé tuir kondisaun no prátika agrikultura iha Timor ne'ebé bazeia ba família ho rai produsaun ne'ebé kí'ik, tanba adapta di'ak liu hasoru impaktu husi krize klimátika no mós hametin reziliénsia hasoru xoke esterna sira seluk.
- Reflorestasaun nasionál tenke halo tinan-tinan iha territóriu laran tomak hodi promove Konservasaun bee iha rai okos, mota sira no ai-laran. Reflorestasaun no konservasaun bee sei suporta mós produsaun ai-han ida ne'ebé sustentavel iha rai laran. aléinde ne'e reflorestasaun no konservasaun sei garantia katak irrigasaun sira ne'ebé harii ona sei iha bee nato'on ba atividade produsaun iha tempu udan no bailoron.
- Diversifika família agrikultór sira nia atividade ba area pekuária, peska no akuakultura atu bele halo produsaun ai han ne'ebé diversifikadu no nutritivu liu tan ba konsumu família nian no mós responde ba demanda iha merkadu. Diversifikasaun ne'e sei garante katak uma kain sira sei la depende ba atividade produsaun ida de'it.
- Investe barak liu iha indústria transformadóra produktu agríkola nudár solusaun ida problema merkadu ba produktu agrikultura no aumenta valor adisionál ba produktu sira ne'e nudár produktu prosesadu. Indústria transformadóra ida ne'ebé forte, sei sai solusaun sustentável ba problema sosiál no ekonomia hanesan inseguransa ai-han malnutrisaun, dezempregu no mós pobreza.

Karta ida ne'e, nudár komunikasaun inisiál atu hatudu ami nian apresiasaun no prontidaun ba servisu hamutuk durante mandatu ita-boot nian. Ho ita nia Governu foun, ita hamutuk ajuda define diresaun ne'ebé loos liu ba futuru Timor-Leste nian ne'ebé di'ak liu ba sidadaun sira hotu

Ami sira ne'ebé servisu iha La'ó Hamutuk sempre pruntu atu fornese informasaun no tuur hamutuk ho ita-boot sira atu diskute asuntu sira ne'ebé liga ho futuru povu no Nasaun doben nian.



Mariano Ferreira
Kontaktu Hp/WA; 7723 7176
Peskidadór ba asuntu Ekonomia, Agrikultura no Rai



Celestino Gusmao Pereira
Hp/WA; 7743 2621